

教 育 蟻 書

第 三 集 第 三 編

德 國 大 哲 學 家 郁 根 傳



商 務 印 書 館 發 行

上海图书馆藏书



A541 212 0004 8359B

教育叢書第三集第十二編目次

哲德國大
學家 郁根傳

- 一 哲學與人生問題
- 二 郁根之生平及著述
- 三 古近哲學家對於人生問題之探究
- 四 郁根之認識論
- 五 過去現在與永久
- 六 人生之兩階級



082735

七 八 九

自由與人格
個人與宇宙
郁根之宗教觀
結論

德國大哲學家

郁根傳

一、哲學與人生問題

世界學問之淵源最古者。以哲學居其一。世界學問之普及最遲者。亦以哲學居其一。哲學者。起於心有所贓異。心有所贓異。則必推籀原因。而思得一究竟之解決。此固人人常構之境。非必有甚深智慧。而後能也。然常智以下。一聞哲學二字。則咸返顧卻走。憚於問津。若以此爲少數學人之專業者。是何故哉。毋亦世人之於哲學。固涉誤解。而哲學家之持論。亦有過於奧蹠。

教 育叢書

艱深不切人事者乎。蓋哲學家所探討者非物質之原始則宇宙之祕筌矣。輶雕龍瓊瑋連犖務於理想上爭一日之勝負而於人間世之經驗反置諸不顧。世人以哲學爲無町畦之言。此其大原因矣。夫研究學問原不必以實用爲指歸。而非於人生問題。犁然有當則哲學家之天職。終有所未盡。其欲以轉移人心指導社會。是猶見卵而求時夜耳。雖然是非所以論郁根。郁根之哲學人生哲學也。郁根之人生觀透宗之人生觀也。其特別問題在宇宙之眞諦。事物之連續。此其極深研幾。有待於幼眇精微之思想。固與其他哲學家同者也。然其他哲學家每

從探究物質入手。然後徐及於爲物質根柢之實在。至於人生問題。則以爲僅屬物質界之表象。棄而不講。郁根則以人生問題爲一大事。常自人類生存之外狀。進究其內容。而於物質問題。反不暇殫論焉。此與其他哲學家異者也。抑不特其問題與他宗不同而已。其探究之鵠的亦與他宗不同。蓋郁根所以欲解決宇宙問題者。意固在由此而得鞭策人心之原動力。使其企圖高尚生活而證自由與人格之眞果也。我國今日人欲橫流。民志疲繭。郁根之說或亦足饗饋精神上之飢渴而爲促進人格教育之先聲歟。作郁根傳。

二、郁根之生平及著述

羅道爾夫郁根氏。Rudolf Eucken 今年六十八歲。以一八四六年生於德國佛里西亞 Frisia 之奧利希市。Zurich 既在本市學校畢業。先後遊哥丁琴大學柏林大學。專攻哲學。一八七四年遂由耶納大學延爲哲學教授。迄今已四十年矣。其學說博大精深。與法國布格遜 Henri Bergson 稱並世之二難。而宗風遐暢。則猶過之。凡世界之哲學家。多遠涉重洋。受書請業。乃至哀斯蘭之土。著日本之宿學。亦有遊其門者。一九一二年。郁根漫遊北美。迭在著名各大學開會講演。彼邦人士尤多。

聞風景從尙論古近學者。其能以奮鬪精神抵抗社會之罪惡。而與人生以至高無上之觀念者。咸以郁根爲翹楚焉。郁根早年著作多屬歷史性質。篇章偶出。往往直湊古代及德國哲學家之單微。稍晚爲哲學史之研究。始稍稍發表己見。最後乃自關戶牖爲創造的著述焉。其巨著凡三。曰「生活之根本及觀念」*Life's Basis and Life's Ideal*。所以立己之哲學系統者也。曰「宗教真詮」*The Truth of Religion*。所以表示對於宗教之見解者也。曰「人生問題」*The Problem of Human Life*。所以評攷古近之哲學說者也。之三書者。均已有英

文譯本矣。

教 育 義 書

郁根儀度溫雅。富於同情。其言論風采。皆有至誠動人之概。而登壇講學。尤能以一種潛勢力。激發聽者。其造語時涉奇詭。且有複雜冗長。詞繁不殺之弊。此在其親炙弟子。恐亦未必能盡通其意。然小疵不掩。大醇而過人之德性。復有以感化之故。聆其講演者。無不歡喜讚歎。心誠悅服。語曰。得經師易。得人師難。如郁根者。殆身兼經師人師之長者歟。

郁根者。學問家而非事業家也。故其生平行事。所可記者。亦祇此。以下各章。將紹介其學說。以爲國人進讀原書之哩引。此亦

著學術史之通例。非自我作古者也。

三、古近哲學家對於人生問題之探究

余於第一章已言都根之所欲解決者爲人生問題。更詳言之。則人生有如何之意義。之價值之鵠的與何者爲其至高恆久之實在是也。都根於自下答案以前。先論列從來已下之答案。此種答案大別爲五。一曰宗教。二曰內在唯心論。Immaterial Idealism 三曰自然主義。Naturalism 四曰社會主義。Socialism 五曰個人主義。Individualism 前二者以人生之真諦。在無形世界。後三者以人生之真諦在有形世界。夫古今道術。

教育

叢書

紛紜。寧能以五說爲限。而郁根所以祇取此五說者。則亦有故。蓋據郁根之意。其所當討論之學說。固以能爲生活制度之根據者爲限。且於事實上已認爲生活制度之根據者爲限。至於理論的人生觀。乃至消極的人生觀。若所謂懷疑論。Scepticism 不可思議論。Agnosticism 者。固非其所當討論也。

然則宗教果能解決人生問題乎。郁根以爲若宗教而勝此任者。則不得不就其最高形式爲論點。卽耶穌教是也。耶穌教之解決人生問題也。注重於高等之無形世界。此種世界與感覺。世界絕異。而亦超出乎其上。人類之與超自然界聯合而不蹣。

躋於自然界之內則耶穌教之所企圖也其於高等世界與罪惡世界之相反陳義既極明晰尤能以當頭棒喝示人以湔滌罪惡變化氣質之自由此不特改過遷善之資抑亦處困安時之萬金良藥也質言之則從已經提出之解決論之其於人類社會最佔勢力者固當首推耶穌教也

設耶穌教之根本問題不受搖動則其宰制人心之勢力必且亘古常新顧近禪以來此種根本疑問亦稍稍起矣一爲科學之進步耶穌教以人類爲宇宙之中樞謂萬彙芸芸皆爲人類而存在據科學的宇宙論則人類不過宇宙之一體其地位不

若是其高尚也。且自法律觀念日明，一般科學家每以萬物爲自然法之結果。萬物既爲自然法之結果，則人格的神之觀念不能存立。皇矣。上帝臨下，有赫都成詩人之臆說矣。此一事也。一爲歷史之探究。耶穌教以天堂爲無上之樂園，據歷史家所發見，則上界清都無過進化史上某階級之特性。而宗教觀念乃人類以自身之影像虛構一上帝而崇拜之，抑與歷史之兩不相容者，尤爲正統式之宗教。蓋由史例以觀，則宗教固常受時代思潮之影響。其於時代思潮以外，有何種之原則否？亦大足致疑也。此二事也不特此也。以近世物質文明日益發達，故

教 育 簄

人類之精力亦專注於是而無暇旁及。陸有鐵路海有汽船空中有飛機。物質界之享受既增而精神界之修養遂鮮。所注意自非困心衡慮斷無呼籲帝天而求助於宗教者此三事也。此皆郁根所以謂正統式之基督教不能解決現代人生問題之理由也。然郁根之宗教觀初不止此。據彼之意宗教實爲「事實之事實」。『The fact of facts』。若能改變形式其勢力將較前益偉也。

內、在、唯、心、論、與、宗、教、同、亦、以、人、生、有、無、形、之、根、本、然、其、所、謂、無、形、根、本、則、存、在、於、現、世、界、中、而、非、獨、立、於、現、世、界、外、其、所、謂、神、

則爲抽象的權能而非具體的人格人類之屬於有形世界。固然也。而其意識界中則常有一深邃之實在吾人從浮淺之生活收視返聽卽進入此實在而爲其全體之一部矣。而旣爲此實在之全體之一部則生活觀念亦自高尙不至逐末而忘本。凡此皆內在唯心論所以振拔人志而使其努力於眞善美之正鵠者也。其所以較優於宗教者則宗教主有神而唯心論主無神。宗教主一神而唯心論主汎神蓋唯心論之神固常現示於世界者也。

唯心論之在前代雖曾佔勢力顧迄於近世則宗風亦漸消歇。

其所謂現世界中有無形之根本今已大滋疑問與宗教之科
 律無殊焉此則又可得而論者蓋欲信舊派之唯心論則必信
 宇宙爲合理的調和的而後可尤必信人類發展之可能性廣
 漢無垠而後可然徵諸事實則宇宙固不乏苦痛與罪惡人以
 競爭之力僅能勝之而人類之可能性尤受制於自然法而爲
 量甚微也此其不滿人意者一也復次唯心論之得占勝利常
 在文藝優美時代於斯時也鉅儒碩彥多從事於美術音樂文學
 之著作故一般人亦被其感化以修養其身心今則因科學
 與人類自然力之進步人咸注意於物質方面生活觀念日趨

浮淺而無形世界之趣味亦益減殺焉此其不滿人意者二也復次唯心論之人生觀常含貴族主義之臭味蓋據經驗所發見人類之能用自力振拔者爲例極鮮藉使有之亦惟身世悠閒能有餘力以研究學問之人而於大多數之勞動社會無與是尤民政時代之大忌也此其不滿人意者三也復次人類之於高尙鵠的也每意存漠視此其不利於唯心論較諸宗教爲尤甚蓋宗教家言尙有一人格的神之觀念以彰瘅善惡而唯心論則不過一種抽象之教訓對於常智庸流并無其驅策力也此其不滿人意者四也積是諸因唯心論遂不能解決人生

教

育叢書

問題而自陷重圍矣。雖然，郁根之所創哲學以大體論固猶是唯心論之一派，至其能不陷舊唯心論之困難而確奏新唯心論之成功，則觀於下文自可瞭然也。

宗教與唯心論之人生觀既如上所述矣。於是郁根遂進述唯物論之人生觀。自然主義者，唯物論之正宗，以對於環境之感官經驗爲人生真諦者也。民智蹇淺之秋，解釋自然，常不脫宗教之桎梏。其以自然與人類若無形世界有何種關係，則其對於自然之本體亦持何種觀念？然此種神人同性說，其在科學進步以後，必難久存。於是科學的探究法遂起而代之。吾人所

教 育 簄

以知自然具獨立之性質而益奮其能力。以陶鑄自然者皆受科學探究法之賜也。顧自天演之說既昌，則人類亦包括於自然之內。凡其生活行為皆爲嚴酷不變之法則所裁制而創造。精神自由思想乃無存在之餘地。思想者感官世界之作用與外圍之戟刺相待爲緣者也。人類者諸因相互之結果無所謂精神原素者也。蓋至是而自然主義遂完全成立矣。

由自然主義論之，則自保者人生之鵠的也。物競者其軀策力。體合者其達其鵠的之方法也。而事物之價值亦惟以有用爲標準。凡真善美之觀念宗教之真理均其所棄斥以其於自然。

生活之保存與享受無直接效用也。此種學說以其直捷了當不涉精神世界之奧義故頗足聳動流俗其能與人生以或種鵠的郁根亦承認之然彼卽進而探究其根源謂自然主義之所以成立者卽爲自然主義不能成立之反證蓋欲從自然之現象構成科學概念則必有獨立創造之思想力而後可此種思想力雖與感官印象相關聯甚者且受感官印象之裁制然其自身則固超出乎感官印象之上自然主義旣從自然現象構成一科學概念是明明有超出乎感官印象之上之思想力也顧仍抹煞事實謂獨立創造之思想力屬於不可能詎非其

教 育 番

自語相違耶。且自然主義尤不能以高尚思想鼓勵人志。如愛慕如利他如因事物之本體而努力皆與自然主義不相容者也。不特此也。據自然主義之解釋人類之自由與人格既屬不可能矣。信如是也。則高尚之企圖不盡屬無益而人道不幾大觳乎。此郁根所以謂自然主義之解釋自然雖較勝於宗教及唯心論而於人生問題仍無當也。

輓近以來社會主義與個人主義亦爲一顯著之人生觀。郁根以爲此等運動實爲超自然論循環剝復之機括超自然論者以無形世界爲人生之眞諦。引之爲道德的翊助者也。顧自宗

教 育 略 書

教與唯心論失勢而無形世界漸無人見信即超自然論漸無人見信然則將從何處得人生之真諦而爲道德的翊助乎其始必自無形世界而注意感官世界固也卽所謂自然主義也。然一加推究自然與吾人固截然兩物則其能爲人生之真諦而與以道德的翊助亦自不可信二者旣俱不可信亦惟返求諸吾人同體之人類以人類之進步爲生活之鵠的而已其以人類總體之進步爲鵠的者則社會主義也反之而以人類個體之進步爲鵠的者則個人主義也。社會主義與個人主義常互相消長互相裁成今則因極端個

教 育 略 書

人主義之反動。社會主義乃代之而興。工業之發展。勞動之組合。與國家個體之學說。皆所以使人知社會分子相維相倚。而不能獨立者也。社會分子既不能獨立。於是其人生之價值亦必在社會關係中而後能定。質言之。則人生之鵠的。在社會之進步是也。夫以社會之進步爲鵠的。個人生活固因此而受限。制甚者且須遭多少之犧牲。然以總體判決。合於理性。多數意見含有真理。故其犧牲亦出於正當。社會主義家以此揭橥。其急待解決之問題。殆屬不少。就中之最要者。則物質利益與精神利益之分配也。

雖然社會主義之合於論理有其根本原則焉卽眞理必從羣衆輿論而出人類之公意爲善惡之最終判決是也羣衆之傾向每以物質進步爲無上之樂利故純粹之社會主義亦不得不以物質享受爲人生之鵠的其初本在精神修養之機會者至是遂不得不改變方針焉此社會主義之不能自圓其說也不寧惟是社會主義以個人價值必從其爲社會分子而後顯此亦祇能見初級社會之真相文明進步以後人類之自覺心日益發達漸知有內部之生活此內部生活之發展則固離社會而獨立且時與社會相反對者也不寧惟是設創造的活動

以社會效用爲限，則其所創造者亦必淺薄窳劣。凡精神上之創造，如美術、如文學、如科學，必極深研，幾有見於其本體之價值，而後能奏最良之成績。是固非社會效用之說所能加以拘繫者也。不寧惟是求真理於多數之輿論，其事尤至爲危險。輿論者，變動不居者也。縱含永久之真理，爲量亦必甚微。古來前史，上固不乏先例也。由斯以觀，社會主義不能爲人生問題之完全解決，亦可見矣。

社會主義之失敗，個人主義之前驅也。凡反對社會主義之論，

據其足助個人主義張目者蓋不少而個人主義之人生觀亦甚爲新穎其所啓示者則自由愉快不爲風俗習慣所束縛之人生也雖然個人主義果能明人生全體之意義與價值乎據個人主義所主張人類之生活皆取足於己而無俟他求信如是也則其生活之全部亦必專顧自身而不暇旁及然人類者思想之動物也決非以此種生活自滿必欲求得一溥博周遍之全體以安置其身心設不得此溥博周遍之全體者則生活且毫無興味而有狹隘拘牽之苦此雖強固之人格亦不能逃此公例者也郁根所謂吾人必以大全體之眼光回察其生活

教

育

書

且企圖其生活卽此意也。而個人主義乃置此不顧。此則其不能解決人生問題之理由也。

宗教也。唯心論也。自然主義也。社會主義也。個人主義也。凡皆於人生之重要事實有所注意者也。然由郁根觀之。則終不能認爲完全之解決。然則郁根之解決法又如何乎？此則余於下列各章所當進述者也。

四、郁根之認識論

哲學家之建立人生觀也。必有其所以建立之根據。根據維何？則真理之探究法是也。此種問題屬於認識論之範圍。郁根著

述中蓋未遑直接注意。然非開宗明義先認定其異同之所在。則入後所陳將益難了解審乎。此則吾人又不得不略論認識論之派別矣。

認識論之最簡單者爲經驗論。Empiricism。經驗論者以種種智識必須自外界及精神界之經驗而得者也。譬如吾人見一紅牆。紅爲常名牆是新見。以此驗彼事實相符。謂牆爲紅。斯無謬誤。他如美味。曼聲。妙香。均以感官當境。察驗其非感官所及。驗者不敢斷焉。以嚴格論。經驗能事已盡。於是顧科學家則進一步由多數之經驗而加以歸納。譬如今日測一。行星。遵循。

圓形循環繞日。他日測星經驗亦同。如是再三遂下斷語。謂諸行星盡以橢圓繞日行走。綜斯二者程度有廣狹之不同。而皆以感官爲智識之限。齊至於六合之外。感官所窮。則置諸不可思議之列。雖然。感官者亦人生之一體而已。今必欲執其偏而遺其全。則事理之不可通者必多。而人道亦幾乎大觳。此則經驗論之蔽也。

進乎經驗論者爲合理論。Rationalism 合理論者認人心能由已知之事件而推及乎未知者也。譬如凡犬皆獸。此吾人所已知者也。卡羅爲犬。又吾人所已知者也。則卡羅爲獸亦可推。

教 育 番 書

想而知。又如直線爲兩點間至短之距離。此吾人所已知者也。甲、乙、線爲自甲至乙之直線。又吾人所已知者也。則甲、乙、線爲繹名學而以前提之真妄定結論之真妄。雖然所謂前提云者。非任舉空虛無朕之名詞。以爲形式上之排列而已。尤必有其構成之實質。如言神明之有無。造化之虛實。又何從得構成前提之實質。以爲推理之根據乎。吾人用其名學的推理。祇能將事實之渾而未畫者剖之。而使畫真理之隱而未顯者出之。而使顯。至於無形世界之事。其爲真爲妄。旣無確切之前提。則欲。

教

育

叢書

由推理而得確切之結論亦屬於不可能。此合理論之主張所以仍與經驗論同其狹隘也。

輓近哲學家漸知經驗論與合理論之不可通。於是別出方法以解決真理之間題。此中職志在法爲布格遜在英爲哲穆詩 Professor William James 在德爲郁根布格遜之認識論。余當別論之。而哲穆詩與郁根則皆以生活及行爲爲認識論之基礎。哲穆詩所主張者爲人益論 Pragmatism 人益論者以對於人生之效用定事實之真妄者也。使其事而大有益於人生則謂之真。非然者則謂之妄。如神明有無之問題。此亦一是一。

非彼亦一。是非其結論至難定也。然以人生之宗趣與觀念必先定神明之有無而後有所歸宿故此項問題終不能存而不論則亦惟熟權夫有神無神果以何者爲較有益於人生而自爲取捨而已其理論上之優劣固可不必計也。

郁根所主張者爲惟行論 Activism 其以真理爲人生之事實以有裨實行爲特性而非徒託諸理想此與人益論同者也然據郁根之意則真理之爲物實較人類之判斷更爲深邃其存在也旣與吾人之經驗獨立而其所以存在也亦非僅以吾人之效用爲鵠的吾人惟身體力行然後能以直觀之作用而確

然。有。所。得。耳。

據惟行論之主張宇宙之難題皆可以實行解決之。郁根嘗曰。『積思不已常足陷人於困境而實行則爲抵禦危險惟一之武器。』又曰。『疑慮之來前不能以思想救治之而能以行爲救治之。』此物此志也。設吾人而欲知人生之眞諦則必當貫注精神於善良鵠的而繼之以實行實行不已而其鵠的亦因是而現實焉。此其理得心安之樂必有勝於徒思無益者萬萬也。今夫蟻本能之發達至爲複雜者也。掘穴而營食避濕而就燥雖莫明其所以然之故而於其所當然仍無慮於後時人類、

亦何莫不然。惟日孳孳回心向上。則終有貫澈鵠的之一日。縱未知造化之真相。而其心則已與造化爲一體。若一涉冥想。則疑心中之志氣反因而頽喪矣。凡惟行論之說略如此。故其所重者在實行。所求者在直觀的啓示。持之過火。頗有蔑視理性之弊。然郁根之求直觀的啓示也。仍以用力於最高鵠的爲前提。其與擿埴冥行者固不可同日語也。（案郁根學說與吾國陽明最相似。陽明倡知行合一之說。曰知是行之始。行是知之成。知外無行。行外無知。又曰大學言如好好色。見好色屬知。好色屬行。只見色時已是好。非見而後立心去好也。今人却謂必

先知而後行。且講習討論以求知。俟知得真時方去行。故遂終身不行。亦遂終身不知。郁根倡以行救知之說。曰。人生之實際問題。爲智力所不能解決者。可用實行以解決之。雖一則知行對舉。一則重行輕知。然陽明之所謂知。乃明德之本體。亦卽郁根之所謂直觀的啟示。與尋常所謂智識。仍不同也。

● 五、過去現在與永久

郁根之探究人生問題。頗注重過去之歷史。誠以吾人之生活。爲現代思潮所束縛。常狹隘委瑣。跼蹐苟近。必研究歷史。然後能觀其通。而會其全也。研究歷史。旣深。則古人之經驗。皆吾之。

教 育 紋 書

經。驗。凡。英。雄。聖。哲。之。偉。業。懿。行。當。其。處。境。相。同。不。啻。有。感。通。默。契。之。妙。而。生。活。之。內。容。亦。因。而。闊。富。矣。不。特。此。也。現。在。世。與。過。去。世。之。連。續。亦。惟。研。究。歷。史。始。能。知。之。現。在。世。者。瞬。息。相。代。於。吾。前。者。也。其。根。柢。則。在。過。去。世。其。希。望。則。在。未。來。世。設。吾。人。惟。恃。此。白。駒。過。隙。之。現。在。世。爲。生。活。之。根。柢。則。浮。生。若。夢。亦。日。卽。於。死。亡。而。已。郁。根。所。謂。『無。連。續。則。無。生。活。之。內。容。』誠。不。誣。也。吾。人。之。視。過。去。世。也。常。以。爲。一。成。而。不。變。而。郁。根。則。以。過。去。世。爲。可。變。吾。人。舊。日。縱。有。失。德。遺。行。但。能。痛。自。刻。責。則。道。心。戰。勝。而。舊。染。之。汚。亦。從。而。湔。滌。所。謂。事。物。之。完。成。者。據。郁。根。之。意。

教

育

叢

書

則皆在方成之會而非達已成之境者也。已成者其表面之一部方成者其包涵之全體既注意於包涵之全體則過去與現在世自能貫通一氣矣。

思想界中有暫時之現象有永久之真理此又歷史所以詔我而無誤者也吾人博稽載籍常見一時代之思想在他時代則視同芻狗甲社會之思想在乙社會則笑爲無稽此所謂暫時現象也然於暫時現象之外有用被乎思想界之全體而脫離時間空間之關係者則所謂永久常存之真理也此永久常存之真理雖歷時代之變遷而不與之俱變雖經謬誤之解釋而

書 著 教 育 簄

不與之俱誤。此於道德界上證左最爲顯著。道德之範疇雖因社會之效用而樊然不同。然道德之觀念則獨立於社會環境與個人生活之上而殊塗同歸也。又如名學公例亦爲永久真理之顯證。思想之有效常有固定之原則。非遵此固定之原則不能致思。而窮理也爲問。此道德觀念何以能殊塗同歸爲問。此名學公例又何以能固定不變。則人類之生活必有永久常存之真理爲根柢亦大可見矣。

惟宇宙有永久常存之真理。故人類能向高尚之觀念而努力。如大文學家。大美術家。大科學家。大事業家。常以其身爲實現。

教育叢書

觀念之機械而犧牲一切以奔赴之此等人之精神詎區區血肉之軀所能加以束縛哉且一時代之智識人每感其不足而更求其深一社會之制度人每苦其未備而思增其美孰張主是孰綱維是亦惟此永久常存之眞理而已此永久常存之眞理郁根字之曰『普遍之精神生活』*"The Universal Spiritual Life"*以爲雖不生不滅而亦與時流行雖周遊六虛而亦因人而見凡人類之精神界所以有權能有信據罔不以是爲源泉焉。

以上所述皆郁根探究真理之結果也其始則解剖人生之主

要特性而發見其虛幻。繼則討論真理之永暫二義而分別其異同。終則詔示吾人以現在之能戰勝過去精神之能超越物質使知永久真理實存乎普遍之精神生活中彼之結論固非由嚴確證據而定誠以真理之爲物非能於語言文字中表示形相也。然其開示門徑直指本源所裨益於人生問題者則已鉅矣。不特此也。近世之人生觀如上章所述之自然主義社會主義個人主義等據郁根之意亦必承認無形生活始能成立。自然主義謂宇宙集多數元質而成然元質所以能翕而不散者則以有生氣爲之連續也。社會主義常雜人類之凡庸與客

感。然。其。所。舉。以。爲。標。的。者。則。理。想。之。人。類。也。個。人。主。義。以。個。人。
進。步。爲。人。生。之。極。詣。然。其。進。步。之。境。則。必。非。以。經。驗。界。爲。限。也。
此。非。皆。於。無。意。中。已。認。有。普。遍。之。精。神。生。活。乎。至。於。歸。心。普。通。
之。精。神。生。活。何。以。能。滿。足。人。生。之。意。志。而。得。完。全。之。解。決。何。以。
能。排。除。人。類。下。劣。之。動。機。而。證。自。由。與。創。造。之。正。果。此。則。當。於。
下。章。再。爲。詳。述。者。也。

六、人生之兩階級

郁根之哲學以認有普遍之精神生活爲中堅彼持唯物論者以吾人含生稟氣必受感官經驗之陶範於是謂生活不離乎

自然持唯心論者以世界成住壞空無非主觀作用之幻相於是謂生活獨恃乎心智據郁根之意則毗物而滅心者非也尊心而絕物者亦不得謂是惟此高妙闊博之精神生活始足當人生之真諦耳蓋郁根之人生觀不特與唯物論不同抑且與純粹之唯心論不同者也。

吾人之自然生活其觀察之方亦隨時代而異創世記之著者以人類爲上帝之肖像希臘之古德以萬象爲神聖所憑依此皆過信自然者也耶穌教興修證靈魂排除物慾則人世紛華皆等糟粕科學家言推闡質力注重實證則天演公例又莫可

或違由斯以觀。自然與精神之勢力孰高孰下。又安從論定乎。於是又有汎神論者起而定之曰。事無所謂高下也。一而已。一者何。宇宙是已。宇宙者何。神明是已。惟吾人未能通觀宇宙之全。故常若有苦痛與罪惡之見存。實則不過人心之假象而已。宇宙之眞際。有善而無惡者也。調和而完美者也。此亦足以壯吾人之志氣。增生活之樂觀矣。顧郁根之意。則不然。據郁根之意。則宇宙既不能無矛盾。人生亦不能不遭反對。惟於矛盾與反對之事。實知之愈明。始於陶淑精神之必要。感之愈切。正不必掩耳而盜鈴也。

人類之在初級社會也。一自然生活之產兒而已。飢餐而渴飲。趨樂而避苦。凡所爲營營汲汲者。無非求滿其肉體之慾望。其最高之信條。則功利主義也。其道德之制裁。則風俗習慣也。使人類之思想。惟以是爲限。齊則其進步亦將以是爲止境。以無所以鞭策而促進之之具也。然高級社會之人類。決不以自然生活爲限。其思想之能力。常能見及乎高尚道德。而不爲功利主義與快樂主義所束縛。由此孟晉不已。則真善美之觀念。日益啓露。且有犧牲肉體。以成其至高之企圖者。此則所謂精神生活也。郁根以精神生活爲高等生活。自然生活爲下等生活。

以爲凡在人生常具有此兩種現象也。然則此兩種現象其關係又何如乎。曰其第一事則精神生活非發源於自然生活也。精神生活與自然生活之不同非程度上之間題而性質上之間題故天演家之化成說決不能明其甲乙之關係就自然生活言之則人之所以爲人者謀一身之樂利求社會之欣賞耳外此卽非所計然世固有置一身樂利於不顧棄社會欣賞而不取者則以精神生活有其獨立之根柢爲之另闢一新天地也此一事也其第二事則精神生活非與自然生活成平行線而並進也精神生活之境界非於自然

生活達進化之某階級不能發現動物者完全屬於自然界者也。故其本能其趣向不能出自然之範圍人類者立於自然與精神之交界間者也。故一方面受自然之陶制一方面已具精神之胚胎然其自然生活雖達進化之極點而其精神生活則猶在幼稚之時代則以由進化之全體觀之自然之進化祇能代表其最初第一步也此二事也其第三事則人生之鵠的在由自然生活而漸進於精神生活也此非謂精神生活爲自然生活之產物也夫精神生活旣有獨立之根柢則其與自然生活無原因結果之可言亦自可知所謂漸進云者亦在使精神

教育叢書

生活循其當然之塗轍而借徑於自然生活而進化而已。其進化之形式謂之爲遞嬗的寧謂之爲自身的也而精神生活既爲自身之進化則自能利用自然而爲所汨沒所謂道心勝而人慾滅也此三事也此三事者自然生活與精神生活之關係亦卽吾人所以能發展自由而表見真正之人格之確據也。下章所述將及自由發展之步驟與真正之人格表見之次序則尤郁根人生哲學之關鍵學者所不可不注意者也。

七、自由與人格

初級社會之人類泰半爲自然界產兒旣如上章所述矣於斯

時也。人之所以爲人，殆無內容之可言。旣無所謂自由，亦無所謂人格深譬。取喻正如小兒所踢鞬子，左之右之一，隨矛盾之衝動爲轉移。世固有人其終身之識想，以是爲限闕者，斯其立身行事亦惟爲情慾與習慣之奴隸。雖其精神生活之根柢，有時能偶然啓露，然以高等衝動與下等衝動糾紛錯雜，渾而未分，則高尚之新生活終末由實現。誠以此等人受制於自然者，至深其注意之力，每爲其所轉移，所桎梏，而未易解離也。然就常人論之，則每有對於現世境遇深不滿意之時，此如吾人感覺之用局於五官，一旦自思，吾今所爲究與禽獸有何差。

教 育 畫 書

異。又如吾人盲從社會時風衆勢固敢或違。一日審知輿論虛妄。正如空花頃刻萬變而無眞際。又如吾人愛惡攻取相盪。相摩末由自主。一日覺悟欲以自力恢復主權。如是思維高等生活。卽於吾心蟄潛待啓。舉凡世間是非好醜。其在此時皆不遽信。而其結果則又視學說之訴合吾心者而定。假如信自然主義之說耶。則將以吾身託體乎自然而奉爲行事之科律。又如信汎神主義之說耶。亦惟以人生優遊乎帝力而無疾祥。金之躍治。又如信樂天主義之說耶。則世界之上本有善無惡。有是以無非。而吾人之彼我見分別。見益出於無謂。凡此種種皆足以

撫慰吾心之瘡痍而暫得其寧貼惟就精神生活之進步而言無異迷陽卻曲顛躡於中道耳。

雖然精神生活之進步非必以是爲止境也其能不懈益勵奏最終之勝利者往往有之試爲言其步驟則當自知自然世界之卑下汚濁始既知自然世界之卑下汚濁則日以汨沒於其中爲深恥而惟欲引去之爲快曰吾固人也胡爲受物質勢力之制裁不能違抗吾固獨立自主之人也胡爲社會相沿之道德不加思索而奉若神明此時其人之靈魂與利悅紛華戰與風俗習慣戰大有不安於現世界之象久之而知世界有二有

肉體之世界有精神之世界則遂毅然決然捨彼而取此焉。是卽精神生活第一步之運動也。此之運動郁根名之曰消極運動 Negative Movement 消極運動者非遁世投荒如山林枯槁之士之所爲也亦非怨天尤人如憤時嫉俗之士之所爲也亦眞知灼見於世界相反之現象而善擇其所以自處者而已。勇士之作戰焉必先除沿途之障礙然後入軍陣之中堅而人生問題亦復如是非於舊生活有所拒絕則不能於新生活有所企圖其明快決絕之態度蓋非委心任運者所可同年而語矣。

人心之不滿於自然界而思去之也。謂之消極運動固也。然雖消極之時已有積極之性存。蓋既於甲方面有所棄。則必於乙方面有所取。棄取一得其正。而自我之進行亦由斯發軔矣。郁根則名之曰經驗之新直接 New Immediacy。前此所關切最深者。感官世界也。現代社會也。及今視之。則皆處於次等之地。位而別有其所祈求。歆羨者在世人所認爲未來世界者。今乃知。惟此爲眞實無妄。自性具足之世界。而無俟乎他求焉。此卽經驗之新直接之謂也。此經驗之新直接爲吾人自我與其本有之生活力相直接。亦卽吾人自我與普遍之精神生活相直。

接而個人生活亦起根本之變。更靈臺湛然居中馭外舉凡感官之印象。無意識之衝動皆無得而蔽之焉。斯其立腳地之穩固爲何如耶。

由消極運動而得經驗之新直接由經驗之新直接而得人生至高之報酬報酬者何則自由是已人格是已人生之不朽是已請先就自由言之夫自由之爲物非可以一蹴幾也必以畢生精力傾注於是而後能達勝利之鵠的質言之則吾人有生之日無在非爲自由而戰之日也此時四周困難突起環生自不待論而吾人所以制勝者亦非僅恃己力其始則知有精神

世界而默契之其繼則獻身於精神世界而體合之其體合於精神世界之程度益深則其用於自由戰爭之能力亦益強固。郁根有言人必努力於精神生活而後心有把握能得完全之自由此物此志也由是別擇途徑繼續奮鬥以圖於普遍之精神生活有所進步則我之一身已爲精神世界之一體而立身行事皆一本良知從心所欲夫至立身行事從心所欲則外物之誘惑永難再起而自由亦顛撲不破矣。

既有自由斯有人格而郁根所謂人格尤與一般人之見解不同一般人所謂人格者確定個人之地位以與他人相對抗也。

教 育 築 書

據郁根之意。則必以個人獨立自尊之力歸向於普遍之精神。生活始足當真正人格之稱。蓋既努力於最高鵠的而於精神生活爲繼續之體合。則其個人生活亦與普遍生活立於同一地位。其於精神生活不特有相互之關係。抑且無甲乙之可分焉。此吾人之所以溥博高明彌綸六合而不受塵網之羈絏也。然則郁根之人格觀念其高出於自然主義與宿命主義者。又詎可以道里計耶。

人能具高尚之人格。亦必能謀不朽之盛業。此又相因而至。無待蓍龜者。郁根於此頗有語焉。不詳之憾。然其以精神的人格。待著龜者。郁根於此頗有語焉。不詳之憾。然其以精神的人格。

有不朽之德性則籀其言論已可概見蓋據郁根之意人能發展其完全之人格則於現在世及未來世皆爲精神界之主人必不以身死而遽變也且不朽之業正不必求諸杳冥而可驗之於現在凡人於普遍生活體認至深而爲精神界之中心點則其人亦超出於時間之上而能有益於後葉反之而生活觀念不離自然之範圍者斯其所作所爲亦無持久之價值也如上所述自由也人格也不朽也罔非以消極運動爲初基使無此消極運動之一級則此生終爲形役眞正之自我無由見而身死之後且與草木同腐然則此一事也不亦聖凡所由分

而吾人所當極力企圖者哉。

八、個人與宇宙

自由之發展也。人格之表現也。既罔不以普遍之精神生活爲源泉故此普遍之精神生活其性質如何尤不容不論如絕對之存在何以能與自由及人格並行不悖絕對之本體果屬何物果與人生有何種關係宗教之在精神人格中果宜居何等地此皆題中應有之義也此之問題奧蹟難深蓋幾經學者之研究而迄難論定今茲所言亦祇能本郁根之解決法略陳大意而已。

書 著 教

郁根之解決自由問題以人類能否擇最高鵠的爲前提而如上文所述則其屬於能之一面已無疑義故自由之與精神生活其相因而至亦無疑義吾人以個人之意志向精神生活而進行而精神生活卽能示吾人以正路所在使其意志益臻於鞏固其始也或出於勉強其繼也乃純任自然至是而自由之量具足無虧神人之間亦永無其隔閡矣試更引郁根之言證之郁根之言曰「凡人信道愈篤斯其自由愈深道者何膠牢亭毒於吾身之精神生活也」然則人類之自由常與強固之信心並存非有見於精神生活之宏深博大而體合於其中不

教

叢

書

能達圓滿之域亦大可見矣。

人格之獨立與絕對之存在。在此英國哲家所認爲枘鑿難容者。而據郁根之意。則其困難抑未若是其甚。蓋郁根所謂人格。非指凡庸狹隘之形。我而言也。就凡庸狹隘之形。我而言。則愛惡。所攻利慾所迫。其不能默契天心。而冥符神意。又寧待論。雖然。此亦精神生活之境界。未經達到故耳。若旣達精神生活之境界。則立身行事。一遵神明之正軌。吾人之生。又何啻絕對之現實乎。此時吾人自覺心中神聖具足。無俟外求。故獨立之人格。依然存在。惟其獨立人格。必與普遍之精神生活。相直接。而後。

能日進於高明耳。

尙論及此而矛盾之點遂若難免蓋吾人旣具自由獨立之現象何以須依賴絕對之精神生活吾人旣爲形氣所拘何以又能超凡入聖必說明其機榦之所在而後能免自語相違之謬也郁根則應之曰否否此宇宙之第一現象也亦造化之單純原理也凡第一現象與單純原理必非人類理性所能解釋亦惟身體力行而知其實有此種境界而已且奇莫奇於凡人之身而證成聖果而憑藉帝力則自足以致此吾人欲以言思擬議之力窮其彷彿幾何不驚爲河漢者凡郁根之解釋法具如

教育叢書

此此一般批評家所以深不滿意也。討論絕對之本體其最大難關在神之與人是否具同等之品性郁根之於此點則毅然否定之以爲神之存在決非與人類之存在同一意義故謂用神之名詞不如用神格 *Deus* 之名詞之諦當彼更從而論之曰『神者何絕對之精神生活也。此精神生活普博宏深實超出乎人類制限及經驗世界之上。故一方面爲完全獨立之實在。一方面亦包括各種之實在。』質言之則彼之所謂神即鼓勵吾人精神事業之究竟的精神是已吾人之爲奮鬪生活也常若有提撕鞭策之具隱爲其後。

援此豈僅僅人生活動之出產物哉亦由於神力之濟渡耳。至神之其他性質若何郁根則存而不論誠以彼之哲學爲惟行主義之哲學但能說明吾人之行為發源於精神生活而受其策勵已足供人生受用正不必爲憑虛叩寂之譚也。

欲明神人之關係非知宗教之真相不可而郁根之於宗教問題論鋒尤極犀利其所著宗教眞詮一書蓋古近維護教義者之有數文字也夫世人之論宗教也大較不外三說其一則以爲信仰上帝之一種歷史法式也其二則以爲人心靜穆時對於絕對而起之畏敬心不必爲歷史上之法式所限也其三則

教

育 義

書

以爲神人之間感通維繫之機關也據郁根之意則宗教之根柢不僅在歷史的信仰亦不僅在祕密的畏敬而在吾人之生活故其定義當爲人類體合於精神生活之一種行爲此其所以貫徹唯行哲學之宗旨者也是故由郁根論之則宗教之職志第一在保存精神生活保存精神生活者以吾人之身爲精神生活之集中點也唯以吾身爲精神生活之集中點故向上之機相引益長而壁壘森嚴不至爲外物所誘惑宗教者則此種集中活動之形式也第二在歸向新式世界人生之有善惡兩現象旣爲事實所存不容抹煞惟於此兩現象相反體認眞

教 育 書

切。則。德。惟。恐。其。不。修。惡。惟。恐。其。不。去。而。生。活。之。新。紀。元。亦。於。是。
乎。開。宗。教。者。則。所。以。開。此。新。紀。元。之。導。線。也。第。三。在。確。定。人。生。
標。準。吾。人。之。進。德。非。守。一。固。定。範。圍。以。與。其。他。現。象。相。抗。而。已。
也。必。生。活。之。全。體。一。氣。貫。注。認。定。目。標。而。後。立。身。行。事。有。左。右。
逢。源。之。妙。宗。教。者。則。所。以。定。此。目。標。之。根。本。也。明。乎。此。而。宗。教。
對。於。人。生。之。功。用。亦。思。過。半。矣。

雖。然。吾。人。之。於。宗。教。非。可。以。頓。悟。而。驟。獲。也。其。功。候。有。深。淺。斯。
其。所。得。有。精。粗。故。宗。教。之。形。式。亦。可。分。而。爲。二。即。一。普。通。的。宗。
教。一。特。殊。的。宗。教。是。也。普。通。宗。教。者。由。暗。昧。不。明。之。精。神。作。用。

教 育 書 義

而起斯時於自然世界與精神世界之相反已略見大凡而有棄彼取此之意然其所見究尙膚淺故其在精神世界中正如遠客初臨未審中庭之虛實雖於高尙生活具如飢如渴之誠而終若卽若離未能滿足其希望則以其身之與普遍精神尙未爲密切之結合也

世人之宗教心其以是爲限闊者蓋亦不尠惟至歷練世故之後或飽經憂患之餘知區區一身曾不足以相抗於是求助於帝力之益切而普通宗教遂未能饜足其慾望斯時其人對於神之觀念非僅鑒臨在上可望而不可卽也實以爲眞實現

在居於博愛之寶座。以撫靖人生之苦痛。故其所得於宗教者。亦較深能於身心性命有真實之受用。質言之。則其人已爲精神世界之一分子。因此而造成純粹不雜之神。我由普遍之精神生活供給以無窮之助力。與至鉅之獎勵是也。此則郁根之所謂特殊宗教也。

大較言之。歷史上之宗教。殆無非人類對於特殊宗教之企圖。雖然宇宙之真理一而已矣。而教派顧樊然不同。是必有此合而彼離。此是而彼非者。故郁根更論列歷史的宗教。以爲建立絕對的宗教之前提。此又下章所當進述者也。

九、郁根之宗教觀

郁根之宗教觀有其扼要之點焉。則以能解決人生問題爲標。準是也。故各教之繁文縟節。均有所不暇論。惟略述大綱。以見耶教之獨標勝諦。而於耶教之科律。則條分縷晰。論其孰者當存。孰者當廢。以爲建立絕對的宗教之前提焉。蓋郁根之意實以耶教與絕對的宗教最爲近似。於解決人生問題大有裨益也。

則試就世界各教而通觀之。將見其大別不出乎二。其一可名之曰果報宗。Religion of Law。其一可名之曰救世宗。Reli-

gion of Redemption 果報宗者。以上帝爲獨立於世界之外。執其金科玉律。以宰制人間者也。凡上帝所垂法律。人類非服從之不可。作善則降之祥。作不善則降之殃。固不有前因後果之可言。故人類之立身行事。或須自擔責任。而無假借之餘地。此其直捷了當。易於領悟。蓋於文化蠻弱之社會。最爲適用。惟其寅畏上帝。過深。遂以爲信賞必罰。與人治同。其瑣屑而責望人類。過厚。又以爲去惡存仁。皆其自力所能致。此則違反事實。不合文化複雜之人心耳。

果報宗既不合人心。於是救世宗遂起而代之。據此宗之意。則

教育叢書

吾人欲戰勝罪惡。斷非僅恃己力所能奏功。析而論之。則又有消極積極二派。佛教者。消極派之代表也。其開宗明義。以世界爲積僞。稔惡而成。吾人之義務。則在審知此事實。而棄絕之。然旣能棄絕世界。則吾人之義務。即於是乎盡。質言之。則能棄絕自己。吾人之義務。即於是乎盡。問其於開闢新世界。有誘掖之方。乎無有也。於企圖新生活。有獎勵之法。乎無有也。故窮其流弊。足使人無希望。無鵠的。而自墮於灰滅枯槁之途。郁根嘗曰。『佛教之人生觀。可以三事盡之。厭世絕物之爲智也。純任自然之爲安也。寂然不動之爲靜也。』則消極之流弊然也。

顧耶教則異是。耶教之視世界也亦以爲罪惡苦痛之淵藪。然此非上帝創世之本意。上帝之創世固完美無疵者惟世人墮墮冥途不循正軌。然後樸散醇澆而一切罪惡亦由之而起耳。故吾人之責任不當以拒絕罪惡世界爲止境。而更當進爲至善。世界之公民所謂造天國於人世之上也。且吾人爲此力不必盡出於己也。冥冥之間蓋常有帝力爲之後援。故雖遺大投艱可不必中途自餒。此尤足以鼓人生之勇氣。與佛教之專主消極不同矣。郁根更以賅簡之言釋兩教之異同曰「佛教以解脫塵網爲要。」諦耶教則以戰勝惡魔爲要。諦佛教以世界之

教 育 義 書

根柢爲惡耶。教則以紊亂世界之根柢爲惡。佛教謂生活之衝動當全然滅絕之。耶教則謂生活之衝動當葆愛利用之。佛教謂高等世界終無實現之希望。故人生之歸墟義在靜止。耶教則謂世界日趨於向上之途。故吾人亦當自強不息。以求無忝。於所生也。」

凡郁根之宗教觀具如是。故其結論遂於宗教之中。以救世宗爲最勝。救世宗中以耶教爲最勝。而評論之點亦專重於耶教焉。雖然。彼非謂其他各教。羌無真理存也。據彼之意。世界各宗教。無一爲盡僞。而非眞。亦無一能全眞。而無僞眞者。其永久之。

根柢也屬於天者也。僞者其一時之附會也。屬於人者也。耶教所含真理雖於比較之上分量爲多而累代以來歷經人爲之參雜則其屬於虛僞者亦必不尠。彼所以取耶教之教義加以評隲而辨其是非者亦欲汰僞存真使其合於絕對的宗教耳。則如耶教之發心論 Conversion 此都根所認以爲是者也。以其與彼之消極運動最爲密合也。消極運動之第一步固在脫塵世之羈絏及至前進不已則高等世界漸露曙光有不達不休之勢。是則由消極而轉爲積極矣。此由消極而轉爲積極之時則都根之所謂發心也。

又如耶教之贖罪論 *Redemption* 亦郁根之所認以爲是也。所謂過去世之行爲非一成不變但能以現在世之眼光觀察而改變之則自新之途於是乎在卽贖罪之眞詮也惟耶教之言贖罪倚賴於上帝之慈悲者多責望於人類之自力者少則郁根頗不以爲然據彼之意贖罪之動機謂出於教主之援助寧謂爲出於精神生活之現實也且耶教各派於贖罪之必要固不憚苦口曉音而於贖罪以後進圖善良生活之道每存而不論則尤不得不謂之闕點也。

與耶教之贖罪論關繫至切者爲接引論 *Mediation* 接引論

者。以基督爲居間人物而藉以通天人之郵者也。此其有裨人類之脆弱而助其靈魂競爭之決心。郁根亦承認之。然以其說含神人同性論之臭味。故往往認客作主而使神人之直接關係。成爲間接。如羅馬教之拘守儀式崇拜偶象皆接引論作之俑也。雖古來偉人昌明永久之眞理。以誘啓一世之人心典型。所存自足於精神世界大有勢力。然與耶教之接引論則迥不相侔也。

郁根於默示論 Revelation 亦頗信之。惟以爲默示之途轍當由於實行而不由於冥想。吾人持高尚之鵠的密勿勤劬力爭。

上進卽精神生活自身之默示也。且默示之來初不必有一定期限。凡精神的人格無時無默示之機會亦無事非默示之實現。惟實現之時究作何種景象則於其著述中尙語焉勿詳耳。以郁根哲學標唯行論爲職志故於一切神祕論 *Mysticism* 似視之過輕如祈禱禮拜諸說均彼所棄而不取者也。雖神祕論爲建立宗教之要素彼亦承認之然其唯一作用祇在廓人類之心量而去其篤時拘虛之見而流弊所窮乃足使人委心任運以優遊食息於永久無限之上帝之下而個人之特性反因是而汨沒焉不亦得不償失之甚耶。

郁根之論。疑信問題。詞旨最爲新穎。世人之釋。信心也。每以爲對。於此教。或彼教之理性的承認。據郁根之意。則此種見解。未免偏而不全。蓋信心之本體。雖不必與理性相違。然有時理性之力。所已窮者。往往可以信心救之。則其功用。非理性所能限。亦大可見矣。質言之。則信心者。實周被乎人生之全部。使其對於表面相反之事實。確有把握者也。信既如是。疑亦有然。其事亦通乎人生全部。非能以理性爲限。闕而其於宗教經驗。尤爲必不可逃之階級。蓋吾人欲確定新生活。而竟變化氣質之全功。則必經個人之試驗。而後可然。試驗之時。非能卽得確切之。

證據也。則必旁求反證。而後所得之正證爲不誣。此則由疑而生信之說也。且吾人之宗教心欲。常保新鮮原始之狀態。尤非懷疑不可。不則皮膚虛文拘牽形式。其不至買櫝還珠者。幾希矣。

世界各教。每有聖靈示化之奇蹟。而於耶教。則關繫尤深。如七日復活。卽其奇蹟之一端也。據郁根之意。則此種奇蹟。終與近世之科學思想。不符。欲必強通其說。亦惟歸之於心理作用耳。彼旣不認有奇蹟。因亦不認以歷史事實爲信仰之根據。以爲宗教而借重於感官之徵兆者。則其立教之精神。亦已中虛至

耶。教。之。化。身。論。

Incarnation

郁根則以較深之意義解釋之。

謂此不過借以明天人最終聯合之事實。然天人之聯合。凡從事於精神生活者皆可當境立驗。正不必託於史事。以自神也。

三位一體論 Trinity 者亦所以表示天人之聯合者也。欲知

凡人之生具有神性存在。當以三位一體論最爲罕譬。取喻然以其說有概偏爲全之弊。故在思想變遷時代。常足爲真理之障礙。不寧惟是三位一體論。欲所明者宗教之真理也。而其立論則含有哲學之空想。此尤郁根所視爲有害無益者也。都根於耶穌之人格。極重視之。以爲如耶穌之爲人。實可稱精。

神生活最明之證據而使人類對於博愛和平純潔淳樸之新生活益增其希望其生活之根基微妙淵深並不以歷史上之事實盡傾其蘊蓄凡在後世之人俱可引而新之以抵抗無意味之自然現象與凡猥之機械文明也惟彼於耶穌之人格雖深致推崇而世人之崇拜耶穌奉爲教主者則爲彼所反對以爲耶穌人也吾輩亦人也則耶穌所能至之功夫吾輩又何遽不可至者

耶教與歷史之關係較他教更深故其受史家抨擊亦較他教更烈都根謂此種抨擊實有至鉅之價值以其能去世俗之贖

義存永久之真理也夫欲見古昔聖賢之精神經驗而動人高山景行之思則歷史上之事實原不無裨益雖然精神經驗者吾人所欲達之目的也而史事則達此目的之手段也吾人既知目的之所在則於所假之手段自得魚忘筌可耳

郁根對於宗教之史事與儀式視之甚輕旣如上文所述矣顧其視教會也又以爲功用至鉅此則甚可異者彼之言曰『教會者所以使吾人於通常生活中知新世界與新生活之所在也所以使吾人於反對現象中保障其信心鞏固其能力也所以使吾人在新陳代謝之時間中保持永久之真理與普遍之

問題也。」皆其重視教會之證也。惟前此之教會，其損害宗教之處，亦頗不少。此其理由，蓋有數端。宗教所關者，爲人生問題，而教會則偏重理想，故範圍狹隘，常受時代思潮之桎梏。一也。教會必有機械的規律，又必任特定之人以執行之，故世人視規律過重，而執行者之地位，亦過高。二也。以精神事業供個人野心與人間利益之利用。三也。輕內容而重外觀。四也是故。欲教會之日起，有功則改革之事，必不容緩。可斷言也。

然則改革之道，將奈何？曰：亦惟知教會爲化民喻俗之機關，其所宣教旨，斷不能盡賅全教之義蘊而已。故其第一事，則人民

對於。教。會。之。態。度。當。一。任。其。自。由。也。其。入。甲。教。會。也。聽。之。其。入。
 乙。教。會。也。聽。之。即。其。不。入。何。種。教。會。也。亦。可。聽。之。不。得。加。以。干。
 涉。也。其。第。二。事。則。教。會。之。內。當。尊。重。自。動。與。個。性。也。凡。教。會。所。
 認。爲。生。活。經。驗。之。最。終。結。果。者。非。必。人。人。所。能。盡。喻。人。情。有。陰。
 陽。燥。濕。之。不。同。斯。其。入。道。有。見。仁。見。智。之。異。不。能。等。量。齊。觀。也。
 其。第。三。事。則。教。會。不。當。限。定。某。種。教。義。爲。入。道。之。法。門。也。吾。人。
 所。欲。達。者。精。神。生。活。之。境。界。至。其。徑。途。之。所。出。則。常。有。自。由。選。
 擇。之。餘。地。不。當。膠。柱。鼓。瑟。也。此。三。者。皆。郁。根。改。革。教。會。之。意。見。
 以。爲。必。如。是。而。後。能。盡。其。正。當。功。用。避。妨。害。宗。教。之。危。險。者。也。

都根之對於耶教也實已竭其贊同之誠意。凡歷史上之各教其能示吾人以眞理之所在而提醒其內部生活實現其永久秩序者決當以耶教爲首屈一指此彼所反覆詳言者也。顧欲應時代之要求以成爲積極的宗教則其立教之形式亦不可不亟加改革。如耶教之自然觀過於幼稚。耶教之救世觀崎重。外力皆其當改革之端也。質言之則去其已往時代所附會之糟粕而存其精華。是已至糟粕盡去而精華獨存。則耶教與絕對的宗教直謂一而二二而一可也。

上來所述。皆郁根人生哲學之大要也。以其學說既流行日廣。故批評家之攻其缺點者亦頗不少。今試約舉數端以爲本篇之結論焉。

郁根哲學頗有首尾不完之病。此其受抨擊之大原因也。蓋哲家立論往往先爲導言。然後進陳其本義。顧郁根則不然。是誠違反哲家之常軌者。然欲爲導言必不能不涉智力上之空想。而據郁根之意。則人生問題斷非空想所能解決。則其違哲家之常軌。抑有由也。又郁根以精神生活超出於物質之上。故名前者爲本體的 *Substantial* 後者爲外形的 *Existential* 而

教

育

書

於物質世界竟存而不論亦爲其學說不完之一證。然謂其學說爲不完全則可。因此而抹煞其學說之價值則不可也。謂郁根哲學挾假定之偏見此亦批評家之口實也。蓋科學家之觀察事物也必萬法平等而後可。先入之見逆臆之心無所用焉。而郁根則開宗明義卽以尋人生之內容。揭橥旣以尋人生之內容。揭橥則其持論保無有張皇太過者。然使吾人以生活爲全無內容則郁根之說誠有似乎空中樓閣。若旣認生活之內容不過於內容之深淺猶存疑慮則其說之足以堅人信心而明人生之眞諦又端可知也。

教 育 番 書

都根嘗以人類有精神生活與夫天人之聯合神我之自由屬於單純原理此亦其極端之假定爲批評家所詬病者也然郁根所以爲此假定者則亦有說蓋據彼之意人生之根本事實有祇能以生活之自身爲體認而確知其合於真理者然此之真理非理性所能解釋亦非智力所能證明也

郁根以真理非理性所能解釋於是又有責彼爲蔑理論 rationalism 者誠以彼之人生觀於智之一面似視之過輕也然郁根爲日耳曼人日耳曼民族向有重理想而輕實行之蔽故彼特反其道以立論使知人生之足貴者在實行如實論之

教

育

書

則彼之討論人生固未嘗棄理性於不顧也。要而言之郁根之爲人其永久位置如何雖猶待後人論定而其居二十世紀則端不愧救時之豪傑世人方視哲學爲空言彼則以唯行主義救之世人方沈溺於物質文明彼則以精神生活救之然則其學說之一新耳目而風靡歐美不亦大有由耶。

上海图书馆藏书



A541 212 0004 8359B

中華民國六年六月初版

必 翻 作 有 此
究 印 權 著 書

分 售 處
總 發 行 所
印 刷 所
發 行 所
編 築 者
校 校 者

教 育 叢 書

第 十 二 三 集

編

定 價

大 洋

壹 元

陸 角

第 十 二 三

編 哲 學 家

郁 根

傳 一 冊

每 册

定 價

大 洋

壹 元

角 伍 分

外 埠

酌 加

運 費

匯 費

朱 錢

智 元 書

善 修 館

海 務 業

鹽 縣 印 盤

北 海

務 務

印 盤

河 南

印 盤

印 盤

南 路

印 盤

印 盤

街 書

印 盤

印 盤

中 書

印 盤

印 盤

書

印 盤

印 盤

印 盤

印 盤

印 盤

印 盤

印 盤

印 盤

雲 南

寶 鎮

廣 常

貴 州

石 州

新 林

商 務

印 盤

印 盤

書

分

館

東 昌

太 原

開 封

洛 阳

西 安

南 京

北 京

天 津

保 定

奉 天

吉 林

長 春

海 務

印 盤

印 盤

印 盤

印 盤

印 盤

河 南

印 盤

印 盤

印 盤

印 盤

印 盤

鹽 縣

印 盤

印 盤

印 盤

印 盤

印 盤

北 京

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

印 盤

